



(Profesor Madya dan Timbalan Dekan, Fakulti Kepimpinan dan Pengurusan, Universiti Sains Islam Malaysia)

Dr **Mohd Yahya Mohd Ariffin**

# Strategi **GoT** untuk pascaijazah

**P**ada keluaran lalu saya telah membincangkan sebahagian faktor untuk lulus pengajian peringkat ijazah lanjutan. Ruangan ini menyambung perbincangan mengenai strategi untuk lulus pada masa ditetapkan.

## Berdikari

Calon perlu berdikari iaitu berkebolehan dan berkesanggupan untuk melakukan penyelidikan tanpa bergantung kepada penyelia sebaliknya memerlukan usaha sendiri. Memandangkan penyelia sibuk dengan urusan pengajaran, penyelidikan, penerbitan dan khidmat masyarakat, maka tugasnya hanya membimbing, berkongsi idea dan memantau perkembangan calon.

## Merancang jadual kerja

Calon perlu mendisiplinkan diri dengan merancang jadual kerja untuk urusan pengajian seperti Jadual 1. Lakukannya mengikut tempoh masa yang ditetapkan. Misalnya, dalam empat bulan pertama anda perlu mencari bahan bacaan berkaitan bidang yang dikaji, berbincang dengan penyelia, membaca teori yang sesuai dan melakar kerangka dan konsep penyelidikan.

Anda perlu mematuhi penjadualan itu dengan melakukannya setiap hari seperti kita bekerja. Jika belajar sepenuh masa, calon boleh memberi tumpuan dari jam 9.00 pagi hingga 5.00 petang, Isnin hingga Jumaat sepanjang tempoh pengajian walaupun ketika cuti semester pengajian.

Kepada calon yang bekerja dan pada masa yang sama melanjutkan pengajian secara separuh masa, buatlah jadual khusus pada sebelah malam atau hujung minggu supaya dapat meneruskan kerja penyelidikan dengan teratur.

Dalam kesibukan belajar, anda juga perlu memperuntukkan masa bersama keluarga. Jangan jadikan belajar sebagai alasan untuk mengabaikan tanggungjawab terhadap keluarga. Sekali-sekala anda boleh melakukan aktiviti santai seperti bercuti atau melancong bersama keluarga bagi menghilangkan tekanan akibat belajar.

## Jadual 1 Proses kerja Phd

<b>Ketidakpastian maksimum</b> Bulan pertama hingga ke-4 Bidang yang diminati	Bidang kajian yang menarik minat pengkaji. Bidang yang mudah kepada pengkaji melakukan kajian. Mencari babar-bacaan dan berbincang dengan penyelia serta calon lain. Membaca teori yang sesuai dan membuat lakaran kerangka dan konsep penyelidikan.
Bulan ke-5 hingga ke-8 Topik yang sesuai	Mendapatkan idea yang sesuai dengan penyelidikan yang dijalankan. Fikirkan dua atau tiga tajuk yang sesuai. Merangka soalan penyelidikan.
Bulan ke-9 hingga ke-12 Cadangan tesis	Mereka bentuk penyelidikan yang ingin dilakukan. Menyatakan permasalahan kajian dengan pasti. Mungkin menghasilkan sumbangan kepada bidang ilmu. Mengkaji teori terkini dan latar belakang teori bagi menganggarkan kebarangkalian dari segi sumbangan kepada bidang ilmu.
Bulan ke-13 hingga ke-16 Kajian rintis	Membabitkan alat ujian, kaedah pengumpulan data, rangka sampel, kelengkapan yang boleh didapati. Memastikan perkara ini dapat berfungsi bagi tujuan pengumpulan data.
Bulan ke-17 hingga ke-24 Pengumpulan dan analisis data	Menghasilkan sesuatu yang baru, konsep yang menarik dan memberi sumbangan kepada bidang ilmu yang dikaji.
<b>Ketidakpastian minimum</b> Bulan ke-25 hingga ke-36 Penulisan akhir	Penulisan dalam masa setahun atau mungkin dapat diselesaikan lebih awal. Menghantar tesis untuk pemeriksaan.

## Menyertai seminar dan wacana ilmiah

Calon harus terbabit dalam pembentangan seminar mahupun wacana ilmiah yang berkaitan bidang penyelidikan masing-masing.

Dalam pertemuan sebegini, anda berpeluang bertukar-tukar idea dan pandangan baru serta berbeza daripada golongan intelektual lain mengenai kajian anda. Melalui aktiviti seumpama ini tentunya dapat menambah bahan penulisan dan kajian yang memberi manfaat kepada anda.

## Mendapat sokongan keluarga

Keluarga harus bersetuju dengan keputusan anda melanjutkan

pengajian dan menyokongnya. Mereka juga perlu memahami tanggungjawab anda yang berat sebagai pelajar pascaijazah dengan melakukan sedikit pengorbanan dalam kehidupan berkeluarga.

Belajar ialah jihad dengan tujuan menghasilkan sesuatu yang baik untuk faedah masyarakat. Tentunya pengorbanan yang dilakukan oleh suami atau isteri dan anak-anak sangat bernilai.

## Sentiasa berdo'a

Selain melakukan semua usaha di atas, anda perlu sentiasa memohon doa kepada Allah SWT supaya dipermudahkan pengajian seterusnya matlamat untuk memperoleh Phd atau sarjana tercapai.

## Hindari sikap yang menghalang pengajian

Ramai calon tidak dapat menyelesaikan pengajian masing-masing disebabkan sikap negatif yang menjadi amalan ketika belajar. Misalnya, malas untuk mencari bahan dan membaca bahan ilmiah, suka bertangguh dalam penulisan tesis atau menghabiskan masa dengan perkara lain.

Hindari sikap mudah mengalah terutama apabila menghadapi masalah dan kesukaran untuk menamatkan pengajian.

Sesungguhnya, berjaya atau gagal dalam menempuh cabaran GoT ini bergantung pada diri sendiri.



GAMBAR HIASAN

**Pelajar** perlu ada ketahanan diri untuk mendapat yang terbaik.